

**Kalaallit Nunaanni eqqartuussisarnermik inatsisip aamma naalagaaffimmi tjenestemandit Kalaallit Nunaanniittut pillugit inatsisip allanngortinnejarnissaannik inatsisisstatut siunnersummut missingiutip (Pinerluttulerinermermi eqqartuussisarnermi digitalimik attaveqaatinik atuineq, suliassat nassuernertut suliarineqartut, najuutinngitsoornermi eqqartuussutit, eqqartuussisut aamma najukkami eqqartuussisut tunuartussaatitaanerannut ukioritinnejartut il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut**

**pillugu**

**Inatsisinut Ataatsimiititaliap**

**siunnersuutip aappassaaneerneqarneranut**

## **ISUMALIUTISSIISUTAA**

Inatsisinut Ataatsimiititaliap suliarinninnermini inuttarai:

Inatsisartunut ilaasortaq Anders Olsen, Siumut, siulittaasoq  
 Inatsisartunut ilaasortaq Aqqalu Jerimiassen, Atassut, siulittaasup tullia  
 Inatsisartunut ilaasortaq Harald Bianco, Inuit Ataqatigiiit  
 Inatsisartunut ilaasortaq Mariia Simonsen, Inuit Ataqatigiiit  
 Inatsisartunut ilaasortaq Mala Høy Kúko, Siumut

Ulloq 29. marsimi siullermeerinninnerup kingorna siunnersuut ataatsimiititaliamit misissorneqarpoq

### **Siunnersuutip imarisai siunertaalu**

Danskit Naalakkersuisuisa aamma Namminersorlutik Oqartussat Kalaallit Nunaanni danskit akisussaaffigisaannik ineriertortitsinerat tunngavigalugu inatsisisstatut siunnersuut suliarineqarpoq. Annerusumik Kalaallit Nunaanni eqqartuussisarnermik inatsisip allanngortinnejarnissanik siunnersuutinik arlariinnik inatsisisstatut siunnersuut imaqarpoq, pinerlunnernik suliassat suliarineqartarnerisa pitsanngorsarneqarnissaannik siunertaqartunik.

- Pinerluttulerinermermi eqqartuussisarnermi digitalimik attaveqaatinik atuisinnaanermut tunngavissamik eqqussissaaq.

- Suliat nassuernertut suliarineqartut pillugit malittarisassanik eqqussisoqluni, ingerlaannartumik eqqartuussutinik taaneqartunik eqqartuussuteqartoqarsinnaanngussaaq.
- Pinerlunnermik suliassani najuutinngitsoorermut eqqartuussuteqarsinnaaneq annertusineqassaaq. Allannguutip siunnersuutigineqartup malitsigivaa, suliani akiligassinneqarermik, arsaagaanermik, biilersinnaanermut allagartamik arsaagaanermik aamma taarsiivigininnissamik taamaallaat kinguneqartuni, unnerluussaq najuutinngitsoorpat nassuersimasutut inatsisitigut paasissutissiinertaqanngikkaluartumik eqqartuussiviit pinerluttulerinermi sulianik naammassinnissinnaanerat, aamma suliaq allanik upternarsaatinik saqummiinertaqanngitsumik aalajangiiffigisinnaassagaat. Aamma allannguutip malitsigissavaa, unnerluussaq akuersiteeqqaarnagu eqqartuussutissamik isumaqatigiinniarnerup eqqartuussuteqarfingineqarsinnaalernissa, unnerluussaq najuutinngippat isertitsivimmi inissinneqarsinnaaneq (sivisunerpaamilli qaammatini arfinilinni).
- Kalaallit Nunaanni eqqartuussivinni eqqartuussisunut aamma inatsisilerituunut tjenestemanditut atorfiliinnut allanut tunuartussaatitaanermut ukioritinneqartut 65-iniit 70-inut qaffanneqassapput, kiisalu najukkami eqqartuussisunut tunuartussaatitaanermut ukioritinneqartunik aamma taamannak qaffassisuseq inissinneqassalluni. Tamanna Danmarkimi tunuartussaatitaanermut ukioritinneqartut pillugit malittarisassat assigai. Malittarisassat eqqartuussisut eqqartuussinikkut taamaallaat soraarsinneqarsinnaanerannut attuumassuteqarput. Ukioqqortussuseq pissutigalugu eqqartuussisoq piginnaasakillismappat, piginnaasakillinerminillu eqqartuussisup aalajangigai sunnertissimappata, atuukkunnaarsinneqarnissamik imaluunniit soraarsinneqarnissamik Den Særlige Klageret-ip aalajangiinissaata tungaanut eqqartuussisoq ingerlaannarsinnaassaaq. Allannguut qaqugukkut soraarninngorsinnaatitaanermut sunniuteqassanngilaq.

### **Siunnersuutip Inatsisartuni siullermeerneqarnera**

Siunnersuutip siullermeerneqarnerani ilaatigut eqqartuussivinni eqqartuussisunut najukkamilu eqqartuussisunut tunuartussaatitaanermut ukioritinneqartut 70-inngortinneqarnissaannut aaqqiissuteqarnerup Kalaallit Nunaannut tullunnerpaanersoq apeqquserneqarpoq.

### **Ataatsimiitaliap siunnersummik suliarinninnera**

Kalaallit Nunaanni eqqartuussivinni eqqartuussisunut aamma inatsisilerituunut tjenestemanditut atorfiliinnut allanut tunuartussaatitaanermut ukioritinneqartut qaffannissaannut atatillugu kiisalu najukkami eqqartuussisunut assingusumik tunuartussaatitsinissamik eqqussinissamut atatillugu ataatsimiitaliap maluginiarpa maanna eqqartuussivinni atuuttoq tassaasoq 65-inik ukioqarnermi tunuartussaatitaaneq, taavalu

najukkami eqqartuussisunut taamaattumik aalajangersimasumik tunuartussaatitsinermik killilerneqanngitsoq.

1933-mi Danmarkimut eqqunneqarneraniilli killiliussaq 70-it ukioritinneqarput. Killiliussap aalajangereranut atorfiup illersugaanerata, atorfinni taakkunani takornartaanngitsoq – eqqartuussisut atorfinnilersikkuminaatsuugamik, eqqartuussivinnut sunnerneqarnikkut aalajangersimasumik iliuuseqartitsiniarnermut atorneqarsinnaannginnissaat qulakkeerniarlugu – taakkunani lu atorfinni sulisinnaassutsimut piumasaqaatinik pingarnernik oqimaaqtigiissitsineruvoq. 65-it ukioritillugit killiussaq taamaattoq Kalaallit Nunaanni 1964-imi aalajangerneqarpoq. Kalaallit Nunaanni killiliussap Danmarkimi killiliussamiit appasinneruneranut ilaatigut agguaqatigiissillugu inuunertussusermut taamanikkut appasinnerusimanera peqqutaasutut tunngavilersuutigineqarpoq.

Ataatsimiitaliap 65-imiit 70-inut ukioqarnermi killiliunneqartup qaffannera pitsaasutut isigaa, aamma allangnuutip tamassumap innuttaasut uumaneqqortusiartornerannut aamma Kalaallit Nunaanni naleqquttunik sulisoqarnermut pisariaqartitsinermut pitsaaqutasutut isigalugu. Ataatsimiitaliaattaaq najukkani eqqartuussisunut malittarisassat siunissami assigiilernissaat pitsaasutut isigalugu.

Siunnersuutip ilusiligaaneranut tunngatillugu ataatsimiitaliap maluginiarpaq ilanngussaq 2-mi, siunnersuutimut oqaaseqaatini, qupperneq 52-imi, ima allassimasoqartoq:

*“Eqqartuussisarnermut inatsit § 283, imm. 2 malillugu, qallunaat inatsisaat § 148 f naapertorlugu aalajangerneqartassaaq suliat angajoqqaatut akisussaanermut, meeqqap najugaqarfianut, meeqqamik najorteqarnermut, allatut attaveqarnermut imaluunniit nunamut allamut aallarnissamut akuersissutiginnitarerit maani naalagaaffimmi ingerlanneqartalernissaat (Danmarkimi aamma Kalaallit Nunaanni)”*

Ataatsimiitaliap tamanna kukkunerusimanissa ilimagaa, eqqortoq tassaassagaluarpoq: “... § 448 f naapertorlugu...”

### **Ataatsimiitaliap inassuteqaataa**

Ataatsimiitaliap isumaqtigiittup siunnersuutip akuersussutigineqarnissaa inassutigaa.

Taamak oqaaseqarluni isumaliutissiisummilu allassimasunik paasinnilluni ataatsimiititaliap siunnersuut aappassaaniigassanngortippaa.

---

Anders Olsen  
Siulittaasoq

---

Aqqalu Jerimiassen  
Siulittaasup tullia

---

Harald Bianco

---

Mariia Simonsen

---

Mala Høy Kúko